

LU ME' RITRATTU

Statura rigulari, frunti chiana
la facci tunna chi pari na luna,
l'oricchi di crapuzza Girgintana,
capiddi tisi comu li spuntuna,
lu nasu nicu, dintatura sana,
l'occhi dù putenti lampiuna;
dù vrazza di na forza erculana
ma strutti pi li scossi di picuna.

Pettu pussenti, larga spaddatura
lu panzuneddu pocu pocu nfora,
lu Cori moddu, la 'mpignazza dura
la paruledda sempri sora sora.
«E lenta lenta la caminatura,
comu na donna 'ncinta primalora».

GIUGNU

Giugnu veni rirennu e ni prumetti
di farini na bedda divirtuta,
taliannu la campagna si diverti
d'un mantu d'oru la viri vistuta.
Niatru l'accugghiemu a vrazza aperti
cu na fauci 'nmanu rugginuta;
cu 'nmarda, cu a l'apperi e cu carretti
ognunu parti pi la sò tinuta.

Pari ch'è festa stratuna stratuna
ogni matina 'nta li primi arburi,
mentri lu sulu cu i sò raggi duna
gran forza e lena ad ogni mitituri.
Si senti di luntanu na canzuna
cu noti beddi, paroli d'amuri;
omini, vecchi, fimmini e garzuna
sunn'u 'nta na surgenti di suduri.

Ma un sentinu stanchizza nè suduri,
metinu tutti cu granni alligria,
mancu si duna cuntinu a lu caluri,
na larma ventu c'è chi frisculia;
mentri la vuci di lu liaturi
porta lu vinu ci dici: Lucia;
e tutti 'ncoru cu tonu d'amuri
gridamu forti ddu Viva Maria.

Sintennu dda scialoma, dda vuciata
si metti a la campagna l'armunia,
la Marunnuzza cuntenti e priata
rireanu ni fa puru cumpagnia.
La sira n'accumpagna pi la strata
ddu duci sonu di l'Avimaria
e la stanchizza di tutta l'annata
la fa passari giugnu e cusì sia.

LU SCILOCCU

*U latru arrobba, ognunu lu viri
e nun c'è liggi chi lu pò puniri*

Liggivi un versu di Pippinu Fruci
ludava tantu la spiga di granu;
dicia chi lu sò fruttu tantu duci
è alimentu pi l'essiri umanu;
finu a ghiorna narrè la stessa vuci
l'havia fattu iò chi sù viddanu;
ma quannu vitti chiddu chi successi
canciai lu sonu, li canti e li versi.

Doppu n'annata di stenti e fatichi
cu spisi di cuncimi e di lavoru
taliavamu cu preu ddi longhi spighi
lucenti, 'ncuraddati comu l'oru;
gioia pi tutti, pi granni e pi nichì
quannu chi 'ncasa c'è pani e ristoru,
ma lu sciloccu fitusu e birbanti
ni fici fari un vuccuni nvacanti.

All'unnici di giugnu fici festa
lu sciluccazzu cu slanciu furiusu,
scippau li reschi, li ciccìa, la 'nmesta
lassannu sulu un fustu fora usu;
ogni viddanu cu li manu 'ntesta
dicia: Diu meu, sugnu cunfusu;
si nun ci penza lu nostru governu
ch'annu a manciari i mè figghi st' 'nvernu?

LU VIDDANU

Nasciu pi maniarli li zappuna
fauci, runca, l'anginu e l'aratu;
prima di l'alba la matina sduna
la sira s'arrampica senza ciatu,
s'ammazza, s'affatica, s'appurmuna
pi dari pani a stu munnazzu 'ngratu;
si miritassi d'oru na curuna
eppuru unn'è di nuddu calculatu.

Comu si susi pi 'ncampagna addizza
un pezzu i pani na gran cipuddazza;
porta a tuttu lu munnu la ricchizza
nun taliannu culuri, sessu, razza.
Ma quannu chi l'avvinci la vicchizza
e chiù nun ci accumpagnanu li vrazza,
è calculatu quantu la munnizza
'nto 'nfunnu di na vecchia cartiddazza.

ORGOGLIO

Terza classificata - primo premio Placido Fardella

Iò scola nun ni potti friquintari,
nun vitti iocu, un vitti divirtuti,
mi misi picciriddu a travagghiari
chi tanta genti ristarù allucuti.
Cumpivi cinquant'anni di zappari
dunni strurivi la bedda saluti;
ma sta spinciazza la vogghiu ittari
mi fannu onuri sti manu 'ncadduti.

Mi fici vecchju e sugnu cuntintuni
nun penzu suffirenze stenti e peni,
e ogni gnornu cu lu mè zappuni
va scippu macchi, va zappu tirreni;
e cu lu scusciu sò fazzu canzuni
e li presentu dunni veni veni.

L'UNISTÀ

Fu di lu Patr'eternu siminata
emblema di dicoru e dignità,
poi di Gesù Cristu pridicata
pi 'nsegnamentu a la cristianità;
fu di li nostri antichi prufissata
cu tantu zelu e scrupulosità;
vinni a li nostri iorna abbannunata
sustituuta fu di la viltà.

Difatti nun'è chiù cosa 'mpurtanti,
anzi s'abbannunò cumplitamente
pirchè li scurcaturi e li birbanti
attraversu di tanti spirimenti,
la difineru cosa disprizzanti
dicennu chi produci picca e nenti.

ME' MATRI

*Targa di riconoscenza del Comune di Misterbianco, 13 luglio
1986*

Fimmina saggia, fimmina assinnata
paria santa, quannu chi parlava,
di tuttu lu paisi rispittata;
iò la ricordu sempri acchiffarata
o cu la scupa 'nmanu o chi lavava;
li sò manuzzi eranu di fata
quantu granni sirvizza spirugghiava.

A ottant'anni iunta tutta bianca
ogni matina e quattru si susia,
mischina caminava supra un'anca
chi la carina chiù nun ci riggia;
ma nun lu dissi mai: «mi sentu stanca»,
morsi scupannu la carrittaria.
Sunnu vinticincanni chi mi manca
ma iò la chiamu sempri: MATRI MIA.

PRUVERBI SAGGI

Biata la saggizza e la prudenza
aviri di la liggi l'osservanza,
la scola rapi la porta a la scienza
e l'analfabetismo all'ignuranza,
la maestra chiù brava è l'esperienza
rifarda disonesta è la spiranza;
si misura accusi la differenza:
cu metru, cu lu litru e la balanza.

Si viri na mal'erva dacci 'nsutta,
si nesci nun lassari porta aperta,
nun friquintari na donna currutta,
nun ci schirzari mai cu na scupetta;
pratica genti di bona cunnutta
accostu chi ci metti di sacchetta;
cerca di pirdunari a cu t'insulta
chi lu pirdunu è la megghiu vendetta.

Loda li scarpi doppu chi li quasi
loda la mogghi doppu vinti misi,
'nto postu ch'un conosci megghiu un trasi,
nun curriri 'ntra rocchi e 'ntra li disì;
nun'invitari Preti a li tò casi
nun dumannari nenti a marsalisi,
pratica bona genti e 'ncerti casi
nun ti curari si paghi li spisi.

Quannu chi viri sciarri, statti arrassu
'nto muru vecchiu nun stari riddossu,
nun cunfissari cun parrinu grassu
nun'affirrari mai u zappuni grossu,
nun mannari a tò mogghi sula a spassu,
nun t'assittari mai vicinu un fossu;
prima talii lu bucu d'abbassu
e poi dicidi manciariti l'ossu.

Si voi un porcu, l'accatti e lu nutri,
si criri santi distruri li quatri,
ogni staciuni procura li cutri
nun praticari monaci nè latri;
senza tistali un carvacari putri,
nun fari mai disprezzi a tò Matri;
e quannu l'avi vunchi comu l'utri
nun dumannari picciuli a tò Patri.

Nun mettiri cucuzzi 'ntra na serra,
nun transitari dunni c'è limarra
e siddu senza mai ti trovi 'nguerra
nun sunari nè trumma nè fanfarra;
si tò mughieri contro tia si sferra
appuntidda la porta cu na sbarra;
nun fari beni mai supra sta terra:
facennu beni, ti finisci a sciarra.

Si nun voi pigghiari qualchi sbronza
vinu e liquori tenili a distanza,
pirchè si unu è peggju di na sponza
nun'è pi la spirtizza, è pi gnuranza;
sia 'mPalermu a Milanu o a Monza
qualunqui postu nun'avi mpurtanza;
pirchè quannu unu conza e unu sconza
tuttu si perdi, e nenti s'accanza.

Lu vinu e l'ogghiu si spremi a lu torchiu,
la sfacinnata sta sempri a lu specchju,
nun calculari mai na cosa ar'occhju
pò essiri chè menu o è suvecchju;
na donna chi cu tanti strizza l'occhju,
ci servi lu maritu pi cuvecchju;
lu babbaluciu dissi a lu finochju
chi sempri ci ni voli di lu vecchju.

VUCCAZZI TINTI

- Vossia binirica zù Libboniu.
- Addiu, chi t'accurri, Giammaria?
- Sapi st'aiu lassannu u matrimoniu
cu la figghiastra da zzà Rusulia;
- Mizzica! ci appizzi un patrimoniù;
e comu fai sta gran fissaria?
- U sacciu; ma purcazzu d'un dimoniù
mi ricinu c'a notti runfulia.

- Vuccazzi tinti, cunn'annu dicoru
di tanti fimminazzi chiacchiaruna,
pirchè un dumanni a lu mè annaloru
o puru a mastro Rocco Cufuruna;
o a Ghiachinu di lu zzù Saroru
cu natri quattru, cinqu o sè arzuna;
amanti d'idda tutti quantu foru
ma nun parlaru mai di runfuliuna.

Di chiacchiari di genti, un ti livari
ascuta a unu chiù vecchiu ri tia;
si voi lu mè cunsigghiu unn'a lassari
chi doppu ti nni penti, Giammaria;
la cosa la putemu accummirari
s'è sulu pirchè idda runfulia:
ti la mariti, ci runi a mangiari
e ogni sira si cucca cu mia.

NUN LU SAPIA

- Papà, stiornu un ghiri a travagghiari.
- Ma s'un travagghiu, appizzu milli liri!
- E penza a la saluti, un ti scantari,
la mamma, quantu picciuli fa ghiri!
- Però ristannu 'ncasa, c'aiu a fari?
- Afferra la picozza, e si ti firi
lu bucu di la tuppa l'allargari
ch'u lettu, tantu bonu nun si viri.

- Tù la capisci ch'è vigliaccheria
iri attintannu a li porti firmati?
Lu sai chi di la tuppa un si talia
chi nun'è signu di genti educati?
- Però quannu la mamma e lu zzù 'Ndria
stannu firmati ddà rintra attangati,
sugnu sicuru chi macari a tia
ti 'nmistissi virè la licchitati.

Ristau cu li vrazza a pinnuluni
pinzannu, sà quantu voti ha succirutu;
cu ddà carogna, cu ddù lazzaruni
sta fimmina caiorda m'ha trarutu;
persi lu sennu, persi la raggiuni
divintau n'armalu nsarvaggiutu.
- E comu? Mi criria un sapientuni
eppuru, nun sapia ch'era curnutu!

E PARIA SANTA

Lu corpu di n'artista mudillatu,
la vuci, un duci suon di viola,
labbra curaddu, la facci granatu
paria lu sò nasiddu mustazzola;
l'occhiu cilesti, lu sguardu fatatu,
li capidduzzi cannola cannola;
iò nn'eru pazzamenti 'nnamuratu
ma mai ci avia rittu na parola.

Un sabatu però mi rinisciu
a la finestra la vitti affacciata.
Ci dissi: ti salutu, sangu miu.
Idda cu la sò vucca nzucarata,
a lu salutu nun mi rispunnio,
mi reti 'nsutta 'nsutta na taliata;
ma vi lu giuru com'è veru Diu,
parsi chi m'arrivò na scupittata.

Na siritina sula la 'ncuntraì.
Ci dissi: dunni veni Rusulia?
Ivi ddà ghiusu ni mè zzu Nanai
e ora staiu turnannu 'ncasa mia.
M'armai di curaggiu, ci 'ncugnai,
lu cori, forti forti mi battia;
picciotti, un vitti chiù, mi la vasai
quannu mi dissi: tantu ci vulia?

LU PANI

Lu pani fu di Diu binirittu
pi l'omu è l'alimentu chiù perfettu;
lu pani s'è mangiatu cù pitittu
ci provi gustu, ci provi diletto;
e ghiò mangiannu sempri pani schittu
la mè saluti a lu riparu mettu.
Si fazzu tistamentu lassu rittu
ch'un tozzu pani ruru nun lu ettu.

Lu pani prima cosa di 'mpurtanza
ci spetta pi dirittu a precidenza
e cu di pani si inchi la panza
si merita rispettu e rivirenza.
Lu pani veru cibo di sustanza
lu vurrissimu tuttu a sufficienza;
piccatu ora chi la picciuttanza
sulu quannu ch'è 'ntavula lu penza.

Si di lu munnu tutti i guvirnanti
d'ogni nazioni, d'ogni cuntinenti
si mettinu d'accordu tutti quanti
Rignanti, 'Mperaturi e Presidenti;
lu sannu chi cu tutti s'inquinanti
la nostra terra un produci chiù nenti;
si producemu granu chiù abbunnanti
daremu pani a tutti li viventi.

Si mi vuliti appressu iò ci vegnu
e certu qualchi aiutu vi lu dugnu
tantu p'amuri, tantu pi cuntregnu
ancora vecchiu e zoppu comu sugnu,
puru si mi purtati fora Regnu
prima di l'alba la matina sdugnu;
e ora stesso m'avanzu e m'impegnu
mititi, stravuliatu e ghiò ntimugnu.

Perciò comu vi pari sta 'ntinzioni?
Fazzu n'appellu a tutti li Cristiani
di ogni razza, sessu e riligioni
Buddisti, Ortodossi e Musulmani;
pinzatici, faciti riflissioni,
però megghiu stiornu chi dumani;
bruciamu tutti s'armi e munizioni,
circamu di produciru chiù pani.